



Sam bi neix daeuj, ban dou fatseng gvaq haujlai saeh mizyinx. Lumj ndaundeiq gwnzmbwn geq hix geq mbouj liux, lumj dujva ndaw suen ceng hai beij gyaau. Gienh saeh ceiq ndeiriu haenx couh dwg Cangh

Cangh Lauxsae “Gemj Biz”

张老师“减肥”

lauxsae “gemj biz” lo.

Ngoenzhaenx banringz, gou ciuq-ciengz caeuq gyoengq doengzhag youq ndaw gyausiz gwn ngaiz. Lauxsae hix doengzcaez caeuq dou gwn. Ndae caeuq lauxsae doq gwn ngaiz doq ganggoj, gou cungj roxnyinh angq-vauvau. Gou gwn ndaej youh hom youh van, daek haeux daek le vanj dem vanj. Ne, seizneix gou youh bae daek haeux lo, cingqngamj bungqdaengz Cangh lauxsae cingq yaek daek haeux, gou gipmuengz ndoj youq baihlaeng de, hawj de daek gonq. Cijraen de gaem aen vanj iq ndeu daek le sieg byaek ndeu, youh daek le didi haeux. Gvaiq lo, Cangh lauxsae baenzlawz la? Ngoenzneix cij gwn di haeux neix, ndaej imq ha? Gou hwnjbae cam de: “Lauxsae, mwngz vihmaz cij gwn didi haeux ha?” Cangh lauxsae cij doiq gou

riu, gijmaz cungj mbouj gangj, hawj gou roxnyinh geizheih dangqmaz. Ngoenz daihngaih, ngoenz daihsam……laebdaeb geij ngoenz banringz, gou raen Cangh lauxsae cungj dwg yienghneix gwn didi haeux. Bingzseiz gwn ndaej ndoet ndaej, seizneix baenzlawz la? Gou ndawsim gag naeuz: “Cangh lauxsae, mwngz dauqdaej siengj guh gijmaz ha?”

Gou saedcaih nyaenx mbouj ndaej lo, daiq dwk haujlai vwndiz bae cam lauxsae: “Lauxsae, mwngz dauqdaej guh maz da, baenzbingh la? Ngoenzngoengz cij gwn didi haeux, mbouj iek ha?” Lauxsae yawj coh gou, lwgda ronghrikrik, de riu dwk naeuz: “Lauxsae biz lai, gyoengq doengzhag cungj mbouj maij yawj gou lo, ndigah, gou gietsim aeu gemj biz.” Dwg ha, Cangh lauxsae dou, fajnaj luenzlu,

baez riu hwnjdaej, lumj ndit ciuq yienghneix ronghsagsag. Mboujgvaq dwg gaenh bi neix daeuj, de cingqcaen dwg miz di biz lo. Dingq daxmeh gangj, baezgonq hwnj gunghgaihgo seiz, de seiqlengq cawx mbouj ndaej buhvaq hab ndang youh habsim, mbouj ndaej mbouj cam doengzsaeh ciq le dauq buhsihcangh ndeu ne. Gou fwt rox lo, w, yienzlaiz Cangh lauxsae dwg vih dou gemj biz ha! Cangh lauxsae ha Cangh lauxsae, youq ndawsim gou mwngz ceiq gyaundeil lo. Couhcinj mwngz miz song bak gaen, dou hix maijgyaez mwngz ha! Cangh lauxsae, vihmaz aeu gemj biz ne? Lek ndaej nanzyouq lai lo.

Cangh lauxsae, mwngz caen gaeuq huk ha!

(bouxzij Cangh Cinz bouxhoiz Ouh Caijfangh)

Gij Gojgaeq Daxgoeng Liuz

刘爷爷的故事

Ranz gou youq laj-mbanj, najranz miz diuz gai iq ndeu. Moix roeb liggaeuq coit, coseiq, coroeq, cogouj cungj dwg ngoenzhaw. Baez daengz ngoenzhaw, ranz gou lij caengz hai dou, boux vunzlaux ndangcanz fong haiz ndeu couh caeuxcaeux daeuj bakdou gou baijdan, boux vunzlaux neix daih-iek roekcib bi. Aenvih de din fwngz mbouj bienh, ndigah baedauq cungj gwih aen dienhdough cisamloek ndeu. Gou haengj heuh de guh “daxgoeng Liuz”.

Gwnz ci daxgoeng Liuz miz song gaiq doxgaiq ceiq dijbauj, it dwg aenfonhaiz de, ngeih dwg aen loengxoux gak cungj hongdawz fonhaiz haenx. Aenvih de doiq vunz yiedcingz, dinfwngz caixhangz, ndigah baez daengz ngoenzhaw, gyoengqvunz cungj humx youq henz ndang de, cingj de fonhaiz, fong daehsaw, nem demhhaiz, hawj haiz hwnj sienq. Mboujdan yienghneix, daxgoeng Liuz sou cienz hix bienzngiez, miz seiz guh saek di hong nyaeq, de cungj gig noix sou cienz. Miz baez ndeu, diuz sai aen daehsaw gou goenq lo, gaiq sujrag hix vaih lo, dang de bang gou fong ndei le, hawj cienz de, de baenzlawz cungj mbouj sou, yienghneix gou caeuq daxmeh doxyaeng cawx sieng bingj-ganh ndeu hawj de, doeklaeng de lij dwg doiq doxdauc.

Baez ndeu, boux daxheiz daeuj fong haiz ndeu lumz aen daeh’ aemqoux haujlai cienz haenx youq gwnz cisamloek de, daxgoeng Liuz ma



daengz ranz raen le, lienzmuengz dawz aendaeh gyau hawj daxmeh gou, heuh daxmeh gou siengj banhfap ra boux vunz doek aen daeh haenx, boux daxheiz sou daengz aen daeh’ aemq le, hawj de ngeihcib maenz cienz, de baenzlawz cungj mbouj aeu.

Yienznaeuz daxgoeng Liuz caenh dwg boux vunz ndangcanz bingzciengz ndeu, hoeng daj gwnz ndang de gou hag daengz haujlai doxgaiq: It dwg mbouj lau dwgrengz, yaek lumj daxgoeng Liuz ityiengh miz gij cing-saenz gaemgaenj mbouj cuengqsoeng haenx; ngeih dwg guh vunz yaek lauxsaed, mbouj ndaej damdoz siuj-bienzngiez, yienghneix cij ndaej daengz bouxwnq aeueiq.

Miz vunz naeuz: “Diuzmingh goj-yij iqt, hoeng aenhoenz mbouj ndaej yahcienh.” Seizneix gou daj gwnz ndang daxgoeng Liuz doeg rox gij eiqsei coenz vah neix lo.

(bouxzij Sij Ausez bouxhoiz Goenggen)

Dahnuengx Gyaetz Daej Gyaetz Hozgaek Gou

爱哭爱生气的妹妹

Dahnuengx gou ya, de daegbied gyaetz daej, daegbied gyaetz hozgaek. Bouxwnq baez nyex de, de couh daejnge’ nge.

Miz baez ndeu, gou caeuq dahnuengx ngamq swiq ndang sat, dahnuengx couh bae ra daxmeh aeu soujgih, daxmeh unqswnh naeuz: “Mbouj ndaej, ngoenzcog raeuz lij bae hag ni! Vaiq bae ninz lo.” Dahnuengx itmienh guh’ unj, itmienh naeuz: “Daxmeh, gouzgouz mwngz lo, gouzgouz mwngz lo, mwngz couh hawj gou ba.” “Ndei ba, hoeng miz gaiq diuzgen ndeu, gou swiq ndang sat, couh aeu soujgih hawj gou, yienzhaeuh bae ninz.” Daxmeh naeuz. “Ndei, ciuq mwngz naeuz.” Dahnuengx han naeuz. Daxmeh dawz soujgih okdaej, dahnuengx doq ciengj gvaqbae, couh sikhaek boenz guhcaemz, angqvauvau. Gou raen le, couh caeuq dahnuengx dox-caemh boenz soujgih. Daxmeh bae

swiq ndang lo, dou boenz ndaej engq mizyinx lo.

Daxmeh swiq ndang sat, ma daengz ndaw rug, itmienh sousib doxgaiq, itmienh naeuz: “Song lwgniq, yaek hwnj congz bae ninz lo, aeu soujgih hawj gou.” Dahnuengx gawqyienz naeuz: “Mbouj, gou lij boenz.” Daxmeh youh cam: “Dauqdaej hawj mbouj hawj gou?” “Mbouj hawj.” Dahnuengx naeuz. Gou ganjgaenj ciengj aeu soujgih hawj daxmeh. Daxmeh hwnjheiq naeuz: “Boux mbouj gangj saenq-yungh haenx gou mbouj haengj de.” Dahnuengx engqgya hozgaek, mbwnj bak daejnge’ nge, doq daej doq naeuz: “Mbouj haengj couh mbouj haengj be.” Dahnuengx guh gij yiengh mbouj youqgaenj. Daxmeh naeuz: “Cungj naeuz ndei lo, gou swiq ndang ndaej, couh aeu soujgih hawj gou. Guh vunz itdingh yaek lauxsaed, gangj saenqyungh, danghnaeuz mwngz mbouj gangj saenqyungh, mbouj lauxsaed, bouxwnq couh mbouj haengj mwngz, gij doengzhag mwngz hix mbouj caeuq mwngz guhcaemz, mwngz couh godog, godan.” Dahnuengx dingq le cij mbouj daej lo.

Boux neix couh dwg dahnuengx gou, dahnuengx gyaetz daej gyaetz hozhaek ndeu.

(bouxzij Vangz Veilingz bouxhoiz Goenggen)

